

Brev a mes commembers en vischnaunca (6)

Cars amitgs

Nossa vischnaunca da Tujetsch ei magnifica duront tuttas quater stagiuns digl onn. Ussa cun l'entschatta dalla stad sededestan las pli biaras plontas ord la sien d'unviern. Las davosas plievias han destadau ellas e dapertut fan flurs alpinas biala paret. Lur odur mida certs loghens sco en ina fatschenta da parfums. Ils aviuls dattan tutta breigia da rimnar pollen e nectar che semida en dulutsch mèl.

Las vaccas pasculontas els cuolms presentan ina viva atmosfera. Jeu mon dapertut entuorn ed ussa enconuschan ellas mei. All'entschatta han ellas tertgau ch'jeu seigi in jester che surpassi lur territori ed engoli lur vadials. Jeu tegnel denton distanza e mon sperasora per buca disturbar ellas. Las biaras dad ellas tschontschan mo romontsch e miu lungatg tonscha buc per comunicar cun ellas. Il chor dils scalins vegn purtaus entuorn dapertut el serenezi dalla damaun. Jeu crei che pli fomentadas ch'ellas ein e pli biala musica ch'ellas creesch. In di stuein nus forsa envidar en ellas en baselgia sch'ellas ein promptas da cantar. Ed ussa spitgein nus ch'ils fretgs selvadis, puma e bulius prospereschien. Biars utschals han fatg lur ignivs en mia vischinonza ellas preits dil clutger. Els percorschan buc mia presenza e fan insumma buca stem da mei.

Igl ei miraculus da patertgar co Dieus ha schaffiu la magnifica natira, aria frestga ed aua schubra. Quei ein zacons schenghetgs gratuits che nus savein guder gratuitamein cheu en Tujetsch. Quels elements natural duessen era far nus pli ventireivels en nossa veta. Nus stuein engraziar persunter a vaccas, aviuls, flurs e plontas che fan nus aschi ventireivels.

El medem mument exista la persuna humana ord tgierp, spért ed olma. Per menar ina sauna veta stuein nus haver quita da nies tgierp. Il spért ei il patertgar ch'exista ord fantasia, lungatg e nossas emoziuns. El ei cunzun unius cun las funcziuns dil tschurvi. Tenor nies patertgar cristian ei cunzun noss'olma e nies spért il pli impurtont ord motiv che quels ein perpetens. Quei munta che nus essan schaffi tenor la semeglia da Diu. Quei gida nus dad esser carstgauns madirs cun morala ed emoziuns.

Magari sedumandein nus daco che certs carstgauns ein pli cuntents che auters. Nus duvrein buca mo beinstonza materiala mobein era benedicziuns spirtala per saver formar nossa veta plein senn. Matthieu Ricard ei in scribent franzos e muntg budist che vegn indicau sco il pli ventireivel carstgaun dil mund. Sunter la finiziun da sia lavur genetica moneculara nua ch'el ei vegnius honoraus eis el serendius el Himalaja per daventar pader budist. El propagescha pliras metodos per possibilitar ina veta pli ventireivla. Naturalmein s'auda meditaziun en sia veta quotidiana ed el ha in'otra maniera da vivar che nus. Sco emprem stuein nus tuts daventar persunas beinvulentas e calar da patertgar mo vid sesez. Mumma Teresa ha detg a sias soras: «Seigies in tiern vivent ella buontad da Diu: Buontad en tia fatscha, buontad cun tes egl e buontad en tiu surrir.»

Nus stuein schar renescher en Tujetsch nossa ierta spirtala: ina spiritualitad che basescha sin nossa cultura e tradiziun. Sco carstgaun sto mintgin s'empitschar da tgierp, spért ed olma. Nossa giuventetgna ed affons basegnan en quei grau nossa assistenza ed atenziun. Aschia sco nus sespruein da haver quita da lur tgierp e spért savein nus era buca ignorar da porscher vivonda spirtala ad els. Lein sespruar da luvrar ensem per ina ventireivla e sauna cuminonza. Lein gidar e sustener in l'auter en mintga situaziun per menar ina veta plein senn per nus tuts. Ludaus sei Jesus Cristus. Semper sei ludaus. Amen.

Sur Mathew Charthakuzhiyil